

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
OPĆINSKI SUD U SARAJEVU  
Broj: 65 0 Ip 312501 21 Ip 2  
Sarajevo, 20.03.2025. godine

Općinski sud u Sarajevu, sudija Nenad Banduka, u izvršnom postupku tražioca izvršenja Postbank BH, Poštanska banka BiH d.d. Sarajevo, u stečaju, koju zastupa stečajni upravnik Bajramović Emin, ul. Put života br. 2, Sarajevo, a kojeg zastupa punomoćnik Začiragić Feđad advokat iz Sarajeva, protiv izvršenika Validus d.d. Varaždin u stečaju, ul. Anina br. 2, Varaždin, Republika Hrvatska, kojeg zastupa stečajni upravnik Nenad Homar, ul. Dravska br. 1, Koprivnica, Republika Hrvatska, radi izvršenja radi naplate duga, v.sp. 2.219.725,41 KM, van ročišta, dana 20.03.2025. godine, donio je sljedeće:

### RJEŠENJE O NAMIRENJU

I – Iz iznosa od 4.166,94 KM, dobijenog prodajom 41 dionice oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, vlasništvo izvršenika Validus d.d. Varaždin u stečaju, po posljednoj tržišnoj cijeni od 103,00 KM po dionici, namiruje se tražilac izvršenja za dio troškova parničnog postupka određenih izvršnom ispravom i to za iznos od 4.166,94 KM.

II – Iz posljednje tržišne vrijednosti 14.939 dionica, koja iznosi 103,00 KM po dionici, što ukupno za sve dionice iznosi 1.538.717,00 KM, oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, vlasništvo izvršenika Validus d.d. Varaždin u stečaju, a koje dionice su Rješenjem ovog suda broj gornji od 29.02.2024. godine pravosnažno dosuđene tražiocu izvršenja Postbank BH, Poštanska banka BiH d.d. Sarajevo, u stečaju, namiruje se tražilac izvršenja kako slijedi:

- za preostale troškove parničnog postupka određene izvršnom ispravom i to u iznosu od 5.933,06 KM;
- za troškove izvršnog postupka određene rješenjem o izvršenju u iznosu od 2.000,00 KM;
- za zakonske zatezne kamate na glavni dug od 2.219.725,41 KM počev od 01.01.2012. do 05.01.2024. godine u iznosu od 1.530.783,94 KM;

III – Potraživanje tražioca izvršenja ostaje nenamireno za potraživanje zakonske zatezne kamate na glavni dug od 2.219.725,41 KM počev od 01.01.2012. do 05.01.2024. godine u iznosu od 624.187,03 KM, kao i za potraživanje glavnog duga u iznosu od 2.219.725,41 KM.

### Obrazloženje

Rješenjem o izvršenju ovog suda broj 65 0 Ip 312501 12 Ip od 18.12.2012. godine, određeno je izvršenje na pljenidbom, procjenom i prodajom 45.992 dionice izvršenika, emitenta Moja banka d.d. Sarajevo, klase ES, koje se vode na računu kod Registra vrijednosnih papira FBiH broj: 8394594, a radi naplate novčanog potraživanja tražioca izvršenja u iznosu od 2.219.725,41 KM sa zakonskim zateznim kamatama počev od

01.01.2012. godine pa do isplate, troškova parničnog postupka u iznosu od 10.100,00 KM i troškova izvršnog postupka u iznosu od 2.000,00 KM.

✓  
Podneskom od 03.08.2022. godine Registar vrijednosnih papira FBiH je obavijestio sud da je došlo do korporativnog spajanja emitenta dionica, te da je došlo do promjene oznake emitenta predmetnih dionica i da ista glasi IKBZRK2, kao i da sada količina ograničenih dionica iznosi 14.980, umjesto ranijih 45.992.

Takođe, podneskom od 29.09.2022. godine Sarajevska berza vrijednosnih papira d.d. Sarajevo je obavijestila sud da je sa predmetnih 14.980 dionica emitenta Asa Banka d.d. Sarajevo, oznake IKBZRK2 moguće trgovati na Sarajevskoj berzi.

Zaključkom od 31.10.2023. godine sud je dostavio Raiffeisen Bank d.d. BiH, kao depozitaru Brokerske kuće Raiffeisen Bank d.d. BiH, pravosnažno rješenje o izvršenju, te naložio Brokerskoj kući Raiffeisen Bank d.d. BiH prodaju 14.980 dionica, oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, vlasništvo izvršenika Validus d.d. Varaždin u stečaju, prema poslednjoj tržišnoj cijeni na dan izdavanja naloga, ali ne manje od 50% nominalne vrijednosti dionica.

Podneskom od 10.11.2023. godine Brokerska kuća Raiffeisen Bank d.d. BiH obavijestila je sud da je u periodu od 2 mjeseca došlo do realizacije prodaje 41 dionice oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, vlasništvo izvršenika Validus d.d. Varaždin u stečaju, po posljednoj tržišnoj cijeni od 103,00 KM po dionici.

Tražilac izvršenja je podneskom od 04.01.2024. godine predložio sudu da se saglasno odredbi člana 190. stav 4. i 5. Zakona o izvršnom postupku FBiH (Službene novine FBiH' br. 32/03, 52/03,33/06,39/06, 39/09 i 46/16, u daljem tekstu: ZIP) dozvoli izvršenje putem prenosa predmetnih dionica u vlasništvo tražioca izvršenja umjesto isplate, obzirom da nije došlo do realizacije prodaje svih dionica koje su bile predmet prodaje, dok je isti podneskom od 19.01.2024. godine obavijestio sud da je im je od strane Brokerske kuće Raiffeisen Bank d.d. BiH, a po osnovu prodaje 41 predmetne dionice, prenesen ukupan novčani iznos od 4.166,94 KM, te je sud primjenom člana 190. stav 4. i 5. Zakona o izvršnom postupku FBiH dana 29.02.2024. godine donio rješenje kojim se tražiocu izvršenja umjesto isplate dosuđuje 14.939 dionica, oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, vlasništvo izvršenika Validus d.d. Varaždin u stečaju.

Podneskom od 20.06.2024. godine, tražilac izvršenja je obavijestio sud da zakonska zatezna kamata na glavni dug od 2.219.725,41 KM počev od 01.01.2012. godine pa do 05.01.2024. godine, kao dana okončanja prodaje predmetnih dionica, iznosi 2.154.970,97 KM, te je uz isti priložio obračun zakonske zatezne kamate.

Navedeni podnesak od 20.06.2024. godine, sa obračunom zakonske zatezne kamate, sud je zaključkom od 26.08.2024. godine dostavio izvršeniku, te ga zaključkom od 23.10.2024. godine pozvao da se u roku od 8 dana izjasni na navedeni podnesak i obračun zakonske zatezne kamate, uz upozorenje da će sud u suprotnom smatrati da je izvršenik suglasan sa istim.

Navedene zaključku izvršnik je uredno zaprimio, te se u ostavljenom roku nije izjasnio na iste, zbog čega sud smatra da je isti saglasan sa dostavljenim iznosom i obračunom zakonske zatezne kamate na glavni dug.

Kako ne postoje druga lica čija se potraživanja namiruju iz prodajne cijene predmetnih dionica, to sud shodno članu 133. stav 1. Zakona o izvršnom postupku nije održavao ročište za diobu prodajne cijene.


Imajući u vidu da je izvršenje u ovoj pravnoj stvari određeno radi naplate novčanog potraživanja tražioca izvršenja u iznosu od 2.219.725,41 KM, sa zakonskim zateznim kamatama počev od 01.01.2012. godine pa do isplate, troškova parničnog postupka u iznosu od 10.100,00 KM i troškova izvršnog postupka u iznosu od 2.000,00 KM, kao i da je u postupku prodaje došlo do realizacije prodaje 41 dionice oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, vlasništvo izvršenika Validus d.d. Varaždin u stečaju, po posljednoj tržišnoj cijeni od 103,00 KM po dionici, te da je Brokerska kuće Raiffeisen Bank d.d. BiH, a po osnovu prodaje 41 predmetne dionice, prenijela na račun tražioca izvršenja ukupan novčani iznos od 4.166,94 KM, to je isti shodno pravilima o namirenju iz člana 133. stav 1. Zakona o izvršnom postupku iz navedenog iznosa djelimično namiren za dio troškova parničnog postupka određenih izvršnom ispravom i to za iznos od 4.166,94 KM.

Obzirom da je sud po prijedlogu tražioca izvršenja dana 29.02.2024. godine donio rješenje kojim se tražiocu izvršenja umjesto isplate dosuđuje 14.939 dionica, oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, vlasništvo izvršenika Validus d.d. Varaždin u stečaju, kao i obzirom da je posljednja tržišna vrijednost predmetnih dionica iznosila 103,00 KM, to je sud iz posljednje tržišne vrijednosti 14.939 dionica, koja iznosi 103,00 KM po dionici, što ukupno za sve dionice iznosi 1.538.717,00 KM, oznake IKBZRK2, emitenta ASA Banka d.d. Sarajevo, koje se vode u Registru vrijednosnih papira Federacije Bosne i Hercegovine, shodno pravilima o namirenju iz člana 133. stav 1. Zakona o izvršnom postupku, tražioca izvršenja namirio za preostale troškove parničnog postupka određene izvršnom ispravom i to za iznos od 5.933,06 KM, za troškove izvršnog postupka određene rješenjem o izvršenju u iznosu od 2.000,00 KM i za zakonske zatezne kamate na glavni dug od 2.219.725,41 KM počev od 01.01.2012. do 05.01.2024. godine u iznosu od 1.530.783,94 KM.

Imajući u vidu da su zakonske zatezne kamate na glavni dug od 2.219.725,41 KM počev od 01.01.2012. do 05.01.2024. godine iznosile 2.154.970,97 KM, kao i da je tražilac izvršenja namiren za zakonske zatezne kamate u iznosu od 1.530.783,94 KM, to je isti ostao nenamiren za potraživanje zakonske zatezne kamate na glavni dug od 2.219.725,41 KM počev od 01.01.2012. do 05.01.2024. godine u iznosu od 624.187,03 KM.

Takođe, imajući u vidu da glavni dug nije ni djelimično namiren, to je tražilac izvršenja nenamiren za cjelokupni iznos glavnog potraživanja u iznosu od 2.219.725,41 KM.

Shodno svemu naprijed navedenom, sud je odlučio kao u izreci rješenja, primjenom člana 133., u vezi sa članom 190. stav 1. Zakona o izvršnom postupku Federacije BiH.



Pouka o pravnom lijeku:

Protiv ovog Rješenja nije dozvoljen prigovor, ali se može izjaviti žalba Kantonalnom sudu u Sarajevu u roku od 8 dana od dana prijema Rješenja o namirenju. Žalba ne odlaže izvršenje rješenja, osim ako tražilac izvršenja u roku od 3 dana od dana prijema žalbe predloži odlaganje izvršenja do odluke drugostepenog suda po žalbi.